



# Bishaan Daakuu

Leveled



Afaan Oromoo



Kitaabni deggarsaa kun gargaarsa maallaqaa ‘USAID’ irraa argameen Dhabbata ‘Save the Children’ fi Biirroo Barnoota Oromiyaa Wajjin qophaa’ee kan maxxanfamedha.

Bara 2009/2017



**USAID**  
FROM THE AMERICAN PEOPLE



**Save the Children**




The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>



# Bishaan Daakuu

Kutaa 4



## Yaadannoo gabaabaa maatiifi barsiistotaaf

- ◆ Yaadannoon kun akkaataa ati barreeffama kitaaba dabalataa kanarraatti dhiyaate barattoota kee ittiin dubbisuu shaakalsiistu siif dhiyaate.
- ◆ Ossoo gara dubbisaa hinseenin dura gaaffilee dubbisa duraa akka barattooni irraatti mari'atan taasisi. Kanaanis yaada isaanii gara mata duree dubbisichaatti akka fidatan, muuxannoo isaaniis akka walyaadachiisan taasisi.
- ◆ Itti aansuun, barattoota rakkoo dubbisuu qabaniif gargaarsa taasisuun akka isaan dubbisan taasisi.
- ◆ Dhumarratti, gaaffilee dubbisuun boodaa akka isaan hojjetan taasisi. Haala kanaanis dubbisanii ergaa barreeffamichaa akka hubataniifi akka madaalan taasisi.

### Gaaffilee dubbisuun duraa

1. Ijoolleen naannawaa keetii tapha akkamii taphatu?
2. Ati hiriyoota kee wallin tapha akkamii taphatta?



## Boqonnaa 1: Bishaan Daakuu

Ispoortiin aadaa akaakuu garagaraa qaba. Isaan keessaa tokko bishaan daakuudha. Bishaan daakuun akka akaakuu ispoortii tokkootti faayidaa hedduu qaba. Faayidaa isaa keessaa tokko jabeenya qaamaa argamsiisuudha. Jabeenyi bishaan daakuun argamu guutummaa qaamaatiif tajaajila.

Namni bishaan daaku qaamolee isaatu jabaata.

Kunis namni yeroo bishaan daakuu qaamolee isaa hedduutti gargaarama. Fakkeenyaaaf, namoonni bishaan daakan harki lamaan hiixatanii bishaan dhawu. Miilla lamaan ammoo bishaanitti ejjetanii dhiittatu yookiin gurdumu.

Dugdi nama bishaan daakuus nisocho'a. Mataanis ol jedhee bishaan of jala dabarsuudhaan akka fuula duratti tarkaanfatamu taasisa. Akka bishaan garaatti hinseennes afuura ukkaamsachuun yookaan afaan cufachuun dirqama ta'a. Bishaan daakuudhaan milkaa'inni kan argamu yoo qaamoleen kunneen waliin socho'uun gahee isaanii bahanidha. Isaan walbuufnaan garuu bishaanichaan nyatamuunillee jiraachuu mala.


Biyyoota guddachaa jiran keessatti akka aadaatti bishaan daakuun kan shaakalamu bishaanuma naannawaatti argamuun ta'a. Bishaan uumamaan jiru ammoo wantoota daakuutti gufuu ta'an hedduu qaba. Isaan keessaa tokko dhagaadha. Bishaan dhagaan keessatti baay'atu daakuun hinmijatu.

Daaktuun dhagichatti bu'a jettee waan sodaattuuf, harka hiikfatee hinsochootu. Bishaan uumamaa daakuuf kan gufuu ta'u inni biraan bu'aa bahii qabaachuu isaati. Bishaan lafti isaa bu'aa bahii qabu daakuun sodaachisaadha. Tabbarraa fuudhee hallayyaatti darbatee nama ajjeesuu waan danda'uuf, akka garaa ofiitti daakuun hindanda'amu.

Bishaan uumamaa daakuuf inni baay'ee sodaachisaan bineensota achi keessa jiranidha. Bineensota sana keessaa inni tokko loyaadha. Bineensa loyaa keessaa kan akka jawweefaa yeroo baay'ee bishaan keessa jiraatu. Bishaanota gurguddaa keessaa ammoo naachifaan jiraachuu danda'u.

Kanaafuu, bineensota kana sodaa ijoolleen baadiyyaa bishaan hunda daakuurraa of quSATU. Haata'u malee, bishaanota gufuuwwan kanaan oliirraa bilisa ta'an barbaaduun daakuu shaakalu. Bishaan daakuu kanas kan shaakalsiisan ga'eessota. Fakkeenyaaaf, namoota Ganda Awaash fudhachuun nidanda'ama.

Namoonni ganda Awaash Dilbata yeruma hunda ijoolleesiisaanii fudhatanii laga Awaash daakuu shaakalsiisu. Yeroo jalqabaatiif dugda isaaniitti baatanii daakuun shaakalsiisu. Yeroo ijoolleen isaanii daakuu baran ammoo qabee garaa isaanii jalatti hidhuun shaakalsiisu. Yeroo isaan of danda'aa deeman ammoo bishaanitti gadhiisanii duubaan hordofu.



## Boqonnaa 2: Faayidaa Bishaan Daakuu

Bishaan daakuun faayidaa adda addaa qaba.

Faayidaa isaa keessaa inni tokko jabeenya qaamaati.

Jabinni qaamaa wantoota hedduu of kessatti

hammata. Isaan keessaa tokko jabina lafeefi fooniiti.

Bishaan daakuun lafee cimsa. Foon lafeerratti

biqilus daran jabeessa. Namni lafeefi foon isaa

jabaate ammoo anniisaa qaba. Namni anniisaa qabus

dhukkuba dandamata.

Nama daakaadhaan qaamni isaa ijaarame tokko  
dhukkubi akka laayyootti qabuu hindanda'u.  
Fakkeenyaaaf, dhukkuboota akka shukkaaraa, dhiibbaa  
dhiigaa dhibee argansuufi wkf salphaatti hinqabamu.  
Namni dhukkuba dandamatu ammoo fayyaa waan  
qabuuf, hojii hojjeteetee bu'aa guddaa buusa.

Fakkeenyaaaf, humni callaa oomishu isa fayyaati  
anniisaa qabudha. Akkuma humni callaa oomishu  
hawaasa tokko keessatti baay'ataniin dinagdeen  
hawaasichaa guddata. Guddinni dinagdee, hawaasa  
midhaan nyaataatiin of danda'u fida. Kun ammoo  
naanna'ee qaamni namaa dhibee garagaraa akka  
ofirraa ittisuuf gumaacha.

Kana malees, jabina qaamaa keessaa tokko ijaarsi  
qaama namaa walqixa ta'uudha. Kana jechuun, namni  
bishaan daaku tokko mudhii gad qallatee mudhii ol  
ammoo hinfurdatu. Kanaafuu, ijaarsi qaama daaktuu  
tokkoo walhinbuusu jechuudha.

Nama bishaan daakutti qaamni isaa itti hinulfaatu  
Namni ijaarsi qaama isaa walhinbuufneefi itti  
hinulfaanne tokko figeed qaqqabuu, dheessee jalaa  
ba'uus danda'a. Si'aa'inni akkasii kun bishaan  
daakuurraa argama.

Faayidaan bishaan daakuurraa argamu kan biraan  
ammoo dammaqina sammuuti. Sammuun dammaqe  
waan haaraa uumuu danda'a. Waan uumames  
hubachuufi itti fayyadamuu irratti nisi'ata.  
Kun ammoo guddina nama dhuunfaas ta'ee kan  
hawaasaarratti gumaacha guddaa taasisa.

Gama biraatiin, namni bishaan daaku tokko qaamni  
isaa akka barbaadetti ajajamaaf. Qabatni isaas yeroo  
bishaan daaku sana qaamoleen kun ergaan takkaa  
waan hojjetaniif. Kun ammoo qaamni daaktuu tokkoo  
guutummaatti leenjifamuun cimina guutuu gonfata  
jechuudha.



### Boqonaa 3: Bishaaniin Nyaatamuu Oolchuu

Faayidaan bishaan daakuu inni dagatamuu hinqabne ammoo guyyaa lubbamaatiif furmaata ta'uu isaati.

Kanaaf ammoo akka fakkeenyatti Abbaa Nafoo fudhachuun nidandaa'ama. Abbaan Nafoo maqaa masooti. Maqaan inni jalqabaa Badhaasaadha.

Badhaasaan maqaa masoo Abbaa Nafoo jedhu kan argate guyyaa lubbamaa tokko ture. Badhaasaan bishaan daakuu danda'a. Ogummaa kana kan bares abbaa isaa Obbo Guutaa irraati. Akkuma namoota ganda isaa keessaa Obbo Guutaan Dilbata yeroo hunda mucaa isaa bishaan daakuu barsiise.

Hanga Badhaasaan of danda'ee bishaanicha daakuu  
danda'utti Obbo Guutaan biraan hinhafu ture.

Kanaanis gaaf tokko mucaa isaa bishaan nyaate.

Obbo Guutaanis daakee ilma isaa baase. Guyyaa  
sanaa kaasee bishaan daakuu beekuun guyyaa  
lubbamaa tokkoof akka furmaata ta'u hubate.


Kana malees, gaaf tokko Badhaasaafi namoonni  
heddduun gabaa dhaqan. Gabaa kanas laga guddaa  
tokko ce'anii dhaqu. Yeroo dhaqaa bishaan lagichaa  
keessa ce'anii gabicha dhaqan. Yeroo galaa garuu  
akka isa yeroo dhaqaa salphaa hinturre. Yeroo  
Badhaasaafi hiriyoonni isaa gabaadhaa deebi'an  
namoonni hedduun bishaanicha qarqara dhaabbatu.

Qabanni isaas bishaanichi guutuu isaati. Bishaan  
lagichaa kan guutes bokkaa erga gabaan yaatee  
roobeen ture. Akkuma namoota bishaanicha qarqara  
dhaabbatan bira gaheen Badhaasaan mala tokko  
male. Kunis warra ijoollee ta'an dabaree dabareen  
dugdatti uddeellatee ceesisuudha. Warra kaaniif  
ammoo hidda kutuun daakee ce'ee muka guddaatti  
hidha. Asdeebi'ee gamanattis hiddicha mukatti hidhe.

Sana booda, namoonni hunduu hiddichatti  
rarra'anii akka ce'an taasise. Yoo tarii hiddicha  
gadhiisanii keessatti kufan jedhee daakuun duuka  
bu'e. Namoonni gariinis hiddichaan ce'an. Kan inni  
yaadda'e hinmafne. Namoota hiddaan ce'aa jiran  
keessaa jaartiin tokko hiddicha gadhiiftee bishaan  
keessatti lafa dhoofte.

Yeroo kana namoonni iyya kurree buusan.  
Badhaasaan garuu daakee qaqqabuudhaan jaartii  
dugdatti baatee baase. Namoonni gabaadhaa galaa  
jiran hunduu ni ililchan. Jaartittiinis nyaatamuu irraa  
ooluu isheetiin baay'ee gammadde.

Guyyaa sana Badhaasaan namoota gabaadhaa galan  
sana ala buluurraa baraare. Kaan ammo bishaaniin  
nyaatamuu irraa oolche. Isaan qofa osoo hintaane  
mi'i isaaniis bishaaniin nyaatamuu oolche. Kana  
irraa kan ka'e maqaa isaa Abbaa Nafoo jedhanii  
moggaasan. Namoonni sunis cimina gurbaa kanaa  
odeessaa gara manaatti galan.



## Boqonnaa 4: Bishaan Daakuun Beekamuu

Badhaasaanis garmalee gammade. Osoo inni guyyaa sana hinjiraannee namoonni baay'ee nirakkatu turan. Duuba deebi'eес abbaa isaa eebbise. Abbaa isaa isa bishaan daakuu isa barsiiseen, "Ekeraan kee aannan haa dhugu!" jedheen.

Hiriyooniisaas Abba Nafoo jechuun maqaa isaa leellisaa Badhaasaa waliin galan. Bishaan daakuun cimaa ta'uun Badhaasaa guutummaa biyyaarrati odeeffame. Kanarraan kan ka'e, miseensa ispoortii ammayyaa kan Gumii Abbaa Bunaa akka ta'uuf hoogganaa gumichaarrraa affeerraan isa dhaqqabe. Badhaasaan garuu qonna gaarii waan qabuuf miseensa gumichaa ta'uuf fudhachuuf fedhii dhabe. Namoonni Badhaasaan guyya gabaa tokko rakkoon isaan oolche gumii ispoortii ammaa keessatti miseensa akka ta'uuf affeeramuu isaa dhaga'an. Warra guyyaa sana rakkoo ooluun maqaa Badhaasaa Abbaa Nafoo jedhanii moggasan keessaa namoonni lama gummichatti affeeramee diduu isaa dhagaa'anii baay'ee itti yaadan. Kan isaan yaachises Badhaasaan osoo leenjii ammayyaa hinargatin rakkoo isaanii furuu danda'uu isaati. Kana malees, osoo leenjii ammayyaa argatee ammoo caalaatti tajaajiluu danda'a abdii jedhu qabaachuu isaaniiti.

Namoonni lamaan sun atattamaan gara Badhaasaa deeman. Akkuma isa bira gahanii nagaa gaafataniin isa inni guyyaa gabaa isaanii oole itti himan. Innis, “Isin gaafas achi turtanii?” jedhee gafate. Osoo inni guyyaa gabaa sana hinjiraannee, namni loon moonaatti isaanii sassaabulle akka hinturre itti himanii caalaatti galateeffatan.

Namoonni sun lamaan dhimma gara isaa isaan fide Badhaasaatti himan. Badhaasaanis sodaqabu itti hime. Isaan keessaa tokko namni oyiruu isaa qotuuf jiraachuu dhabuu isaati. Kanarraa kan ka’e ammoo haati warraafi mucaa isaa rakkachuu danda’u sodaqabu jedhuun affeerricha fudhachuu akka dide itti hime.

Isaan garuu waan fedheyuu yoo ta’e hinsodaatin. Akkuma achi galteen miindaa siif kaffalu. Oyruu kee ammoo qixxee kennattee qochisiifatta. Ofirrayyuu dabartee ormaaf bu’aa taata abdii jedhu qabna,” jechuun jajjabeessan.

Badhaasaan yaada namoota sanaa fudhate.

Akkuma isaan jedhan oyiruu isaa qixxee kennatee bishaan daakuudhaan miseensa gumii Abbaa Bunaa ta'uuf murteesesse. Akkuma murteesesse miseensa ta'e. namoonni achi keessaa hojjetanis Badhaasaa gammachuun simatan.

Badhaasaan bishaan daakuu shaakaluu itti fufe. Isa duraa caalaa ogummaan inni bishaan daakuurratti qabu cimaa dhufe. Bishaan inni daakus mijataa kan ta'eefi bu'aa ba'ii kan hinqabne ture. Badhaasaan inni bishaan hinmijanne keessatti daakaa bare bakka mijatu gahee daran itti caale. Gumicha keessaa namni isaan dorgomu nidhabame.

Badhaasaan bishaan daakuudhaan gumicharra darbee guutuu biyyaatti beekame. Dorgommii guutummaa addunyaarratti bishaan daakaadhaan taasifamuunis tokkoffaa bahee madaaliyaa warqee badhaafame. Madaaliyaa kana birattis badhaasa mallaqaa guddaa argate. Akkuma namoonni sun jedhaniin ofirra taree ormayyuu gargaaruu eegale.

Akkataa kanaan, akka aadaatti bishaan daakuu eegaluun isaa kan ammayyaatiif bu'uura ta'ee beekamtii argachiise. Ijoolleen ollaa Badhaasaas bishaan isaan mana isaanii gajjallaatti daakuu jalqaban guddina isaanii gara fuula duraatiif ka'umsa akka isaanii ta'u hubatan. Fakkeenya isa taasifatanii bishaanicha daakuu itti fufan. Ogummaa isaanii kanas gara isa kan ammayyaatti ceesisuuf murteeffatan.

## Gaaffilee dubbisuun boodaa

1. Badhaasaan maaliif Abbaa Nafoo jedhame?
2. Bishaan daakuun faayidaa akkamii qaba?
3. Ogummaa bishaan daakuu maaltu adda taasisa?

